



Sabtu, 09 April 2022
Ogen: 2 Timotius 2:3-4



Laskar Si Tutus



Ibas Pustaka Si Badia megati nuriken pengalaman kalak sierkiniten tapi ndatken pergumulen. Bagepe bas bagin si deban megati isuratken kerna kiniseran. Penungkunenna tuhu kin kalak Kristen arus erkiniseran? Bage kin pendilota selaku kalak Kristen? Sebab megati kel sibegi ranan, maka kenca aku masuk Kristen ntah jadi sierdahin gereja mberat kel perbebenku.

Labo perbahan Kristen maka lit kiniseran, tapi nggeluh i bas Tuhan mahanca kita peka nandangi perbeben e. Tuhu bas pelayanen pe mbue nge tantangan ras hambaten sijadi kiniseran. Engkai maka bage? Sebab sieteh kuasa gelap enda labo atena jadi adina kita ersada ras Dibata. Adi ibahanna perbeben, bali ras siibahanna man Job, ntah kin kari nilahen kerina aron Dibata ndai, atena.

Erkitek ten tantangan e, Rasul Paulus ipegegehina Timotius i bas pelayanenna gelah ola celus seh ampar i bas ngalaken tantangan ras kiniseran si nderpa ia. Nina bas ogenta maka arus Timotius enda desken sekalak laskar. Sekalak ikataken laskar adi nggo lulus ia latihan dasar ketentaraan si meliputi latihan fisik ras mental. Emaka sekalak laskar fisikna tangguh, ngasup la man bas keadaan genting, ntah pe memanfaatkan kai si lit guna pertahanen geluhna. Secara mental terlatih, la nukah megogo ras daya juangna tinggi. Bagepe jelas tujun geluhna iangkana, emaka disiplin ia. Sora pemimpin eme perintah tertinggi si man ikutenkenna. Bageme cara Timotius ngasup ngalaken tantangan e jadi kalak si menang.

Tantangan ras kiniseran eme ayam-ayam geluh enda. Subuk kita erkiniten ntah lang. Simembedakenca adi la sitandai Dibata, la siikut-ikut IA, talu me kita ban perbeben e. tapi adina siikutken IA. Tetap disiplin ertoto, ngoge Firman tetap tutus, ija kita ernalem ije Tuhan erdahin ngkapiti kita.